

NILAI SEJAGAT DALAM ADAT PERPATIH MENDEPANI MASALAH SOSIAL DALAM ARUS GLOBALISASI

Prof. Madya Dr. Ani Omar
Fakulti Bahasa dan Komunikasi
Universiti Pendidikan Sultan Idris
ani.omar@fbk.upsi.edu.my

ABSTRAK

Tutur yang didengar, waris yang diterima dan tulisan yang dibaca serta dari beberapa kepustakaan menyatakan bahawa adat adalah peraturan hidup, menghilangkan yang buruk dan menimbulkan yang baik, bak kata pepatah ‘hidup dikandung adat, mati dikandung tanah’. Pemahaman yang tepat membolehkan individu itu bertingkah laku dan menyesuaikan diri mengikut kehendak masyarakat setempat. Ini akan mewujudkan keharmonian dalam masyarakat dan sukar untuk melanggar peraturan yang wujud didalam lingkungan sosialnya seperti kata perumpamaan ‘di mana bumi dipijak di situlah langit dijunjung’. Sehubungan dengan itu Negeri Sembilan sering disinonimkan dengan negeri beradat. Kontotasi istilah beradat bererti bertatertib, berbudi bahasa, bersopan santun dan melakukan sesuatu secara sistematik, teratur dan tersusun. Negeri Sembilan telah mengamalkan Adat Perpatih sejak lebih 600 tahun yang lalu. Adat Perpatih merangkumi suatu sistem sosiobudaya yang kompleks dan lengkap serta murni. Sekiranya diamalkan secara terurus ia boleh membina masyarakat yang berbudi bahasa, adil, sejahtera dan bersatu padu di mana nilai sejagat ini semakin terhakis. Berasaskan kepada falsafah dan nilai sejagat yang terkandung di dalamnya maka Adat Perpatih boleh diintegrasikan sebagai panduan hidup harian bermasyarakat. Seperti kata perbilangan ‘dianjak layu, dicabut mati, gemuk berpupuk, segar bersiram’. Ini bermaksud adat menjadi subur jika diamalkan dan terus dipelihara dalam membentuk lahiriah murni manusia bagi menangani masalah sosial yang sering melanda masyarakat moden arus globalisasi masa kini.

Kata kunci: Nilai Sejagat, Adat Perpatih, Masalah Sosial, Globalisasi

Pengenalan

Memasuki abad ke-21 bermakna sesebuah negara memasuki ruang tanpa sempadan yang dinamakan globalisasi. Istilah ini merujuk kepada satu proses meletakkan dunia di bawah satu unit yang sama tanpa dibatasi oleh sempadan dan kedudukan geografi sesebuah negara (George, Ritzer, 2009). Sehubungan itu setiap ruang di bawah ‘langit terbuka’ ini mudah dimasuki menerusi kecanggihan teknologi siber dan internet. Ketika ini gelombang globalisasi sangat mempengaruhi segenap kehidupan manusia, sama ada secara positif mahupun negatif. Dengan ‘menekan butang di hujung jari’ segala informasi mudah diperolehi. Namun apa yang dibimbangi pengaruh negatif terhadap masyarakat terutama melibatkan nilai dan norma. Sekiranya nilai baik yang diadaptasi ia tidak membimbangkan, sayangnya yang buruk menjadi pilihan hingga menimbulkan pelbagai masalah dalam kehidupan masyarakat kini. Halimah Mohd Said (2019) menyatakan sistem nilai wujud dalam sesuatu masyarakat berlandaskan sistem kepercayaan yang dipengaruhi oleh pengajaran melalui tradisi agama dan budaya, serta perkembangan yang berlaku dalam ekosistem

masyarakat tersebut. Sistem nilai memainkan peranan utama dalam menentukan hala tuju masyarakat dan pilihan-pilihan yang dibuat untuk menjalankan urusan hidup. Justeru, kertas kerja ini selanjutnya akan mengetengahkan nilai sejagat dalam Adat Perpatih seperti berbudi bahasa, adil, sejahtera dan bersatu padu yang menjadikan ia sesuai diamalkan sebagai panduan dalam kehidupan masa kini terutama ketika mendepani masalah sosial dalam arus globalisasi.

Metodologi Kajian

Kajian ini bersifat kualitatif iaitu menggunakan kaedah kajian kepustakaan dengan menganalisis jurnal, prosiding dan koleksi bahan sastera yang berkaitan dengan Adat Perpatih.

Adat Perpatih

Mengenali Adat Perpatih bermakna mengkaji suatu sistem sosial yang kompleks dan peraturan hidup yang sistematik berdasarkan keharmonian bermasyarakat serta mempunyai konsep dan ideologi yang disedari dengan jelas. Adat ini diamalkan oleh sebahagian besar masyarakat Melayu Negeri Sembilan khususnya di daerah Rembau, Kuala Pilah, Tampin, Jelebu dan Seremban serta sebahagian negeri Melaka seperti daerah Nanning dan Alor Gajah (Rosli Saludin, 2009). Keunikan Adat Perpatih adalah kerana penggunaan pepatah dan petitih menerusi bahasa berlarik dan berirama yang begitu indah didengar. Ungkapan-ungkapan tersebut mengandungi kehendak dan maksud tertentu sebagai peraturan dan undang-undang. Pepatah petitih ini dikenali juga sebagai teromba. Menurut Za'ba, perbilangan ialah seakan-akan bidalan dan pepatah juga, hanya bezanya ia berperenggan dua, tiga atau lebih, disebut lepas satu, satu seperti orang membilang dan isi kebanyakannya sudah jadi seperti undang-undang yang tetap. (Za'ba, 1965:171). Undang-undang yang tetap yang dimaksudkan oleh Za'ba itu menepati konsep teromba yang mengandungi undang-undang adat. Undang-undang adat di sini bermaksud aturan-aturan yang pada mulanya tidak bertulis, disampaikan dalam bentuk puisi secara lisan dari satu generasi ke generasi yang lain dalam masyarakat Adat Perpatih. Secara umum dapat dikatakan perbilangan adat dilahirkan dan diabadikan bersama fungsinya dalam kehidupan masyarakat. Perbilangan ini diabadikan dalam kehidupan sehari-hari bukan saja melalui aktiviti-aktiviti kesenian berupa tari dan lagu seperti pantun atau syair, tetapi turut meliputi tanggapan, pemikiran, pegangan hidup, peraturan dan perundangan, bahkan resam serta kebiasaan masyarakat dalam kehidupan mereka sehari-hari. Lebih menarik lagi dalam ungkapan itu sering kali tidak memaparkan maksud yang terus (tersurat) tetapi mengandungi maknanya yang tersirat. Bagi pengamal Adat Perpatih setiap aspek kehidupan itu ada nilai dan falsafahnya yang tersendiri. Lantas apabila mengkaji perbilangan Adat Perpatih, kita akan mengetahui tentang struktur dan organisasi masyarakat pengamalnya. Adat Perpatih tidak hanya dipraktikkan dalam urusan adat semata-mata tetapi adat ini telah mengajar masyarakatnya bagaimana hidup bermasyarakat. Lantaran itulah, sewajarnya kefahaman terhadap Adat Perpatih ini dipupuk dalam kalangan generasi muda semoga nilai-nilai yang baik dalam adat ini dapat dituruti dalam mengharungi cabaran dan masalah sosial abad ke-21 ini. Hal ini perlu direalisasikan kerana;

Tegak rumah kerana sendi,
Runtuh sendi rumah binasa,
Sendi bangsa adalah budi,
Runtuh budi runtuhlah bangsa,

Adat bersaudara, saudara dipertahankan,
Adat berkampung, kampung dipertahankan,
Adat bernegeri, negeri dipertahankan,
Adat berbangsa, bangsa dipertahankan .

Rosli Saludin (2007:66)

Sehubungan dengan itu, nilai sejagat dalam pepatah petiti di atas boleh dikaitkan dengan Malaysia sebagai sebuah negara yang rakyatnya bersifat majmuk, terdiri daripada pelbagai bangsa, etnik, kaum, suku kaum, bahasa, budaya dan agama. Setiap bangsa, etnik dan kaum akan mempertahankan identiti mereka yang tersendiri. Namun demikian cabaran utama yang dihadapi ialah memupuk perpaduan dan integrasi antara kaum dan etnik untuk membina, menjalin lantas mewujudkan kestabilan politik, pembangunan serta keselamatan negara. Selain daripada itu adat ini juga menghuraikan perkara-perkara yang berkaitan dengan pengetahuan, kepercayaan, kesenian, moral serta tabiat manusia yang lain sebagai ahli masyarakat. Adat Perpatih yang selalu disebut-sebut ini wujud dalam kalangan masyarakat sebagai budaya lisan bersifat tersirat dalam kata-kata perbilangan adat;

Sepanjang tutur nan didengar,
Waris nan dijawab,
Pusaka nan ditolong,
Sepatah berpantang hilang,
Sebaris berpantang lupa,
Adat itu tersirat,
Bukan tersurat .

Dalam masyarakat pendukung Adat Perpatih, kata perbilangan adat merupakan “pemimpin” dalam semua aspek kehidupan. Kata-kata adat itu dihafal dan disampaikan kepada masyarakat melalui penggunaannya dalam kegiatan-kegiatan yang tertentu. Tema atau isi perbilangan adat banyak memberikan gambaran kepercayaan, nilai dan pegangan hidup masyarakat, gambaran perlakuan dan tingkah laku serta peraturan yang mesti dipatuhi, nilai bermasyarakat atau hidup bersatu padu. Bagi masyarakat pengamalinya, kata perbilangan berupaya menampakkan kedudukan dan peranan seseorang individu dalam masyarakat. Ini termasuklah dalam aspek-aspek yang berkaitan dengan politik, ekonomi dan juga sosial juga aspek keagamaan. Bagi masyarakat Adat Perpatih di Negeri Sembilan aturan-aturan ini lebih dikenali sebagai perbilangan adat.

Nilai Sejagat dalam Adat Perpatih

Antara kesitimewaan Adat Perpatih adalah kata perbilangan adatnya. Ia merupakan alat atau lebih berupa peraturan-peraturan yang dapat mengawal tindakan dan perlakuan anggota-anggota masyarakatnya. Nordin Selat (1982:7) menyatakan dalam masyarakat adat perpatih, individu dan masyarakat itu tidak dapat dipisahkan umpama ”tercencang puar, tergerak andilau”. Puar ialah sejenis pokok di hutan. Andilau ialah sejenis akar yang selalu meliliti pokok puar itu. Jika puar dicencang, andilau juga turut merasa akibatnya. Sesuatu yang menyentuh individu akan menyentuh masyarakat dan sebaliknya. Dalam kata-kata perbilangan ini telah digariskan cara hidup yang begitu harmoni, hormat-menghormati, bantu-membantu antara satu dengan lain,

bertolak-ansur dan sebagainya. Lengkapnya peraturan yang digambarkan mestilah dianalisis melalui falsafah di sebalik perbilangan yang ada demi memastikan dan mengekalkan kesejahteraan dan keharmonian dalam sesebuah institusi keluarga yang dibina, ke arah membentuk masyarakat yang unggul dan mulia. Ini selari dengan satu daripada tiga teras dalam memperkukuhkan perpaduan nasional iaitu konsep penerimaan. Sulaiman Zakaria (2010:13) menyatakan walaupun rakyat Malaysia terdiri daripada pelbagai kaum yang mempunyai cara hidup, anutan agama dan kebudayaan yang berbeza tetapi mereka boleh saling menerima sebagai rakan setia, jiran, rakan sekerja, perkongsian dan sebagainya.

Penerimaan bererti walaupun rakyat pelbagai kaum secara hakikatnya masih belum serasi sepenuhnya antara satu sama lain tetapi mereka mengamalkan toleransi dan menerima yang lain sebagai rakan yang setia. Kita perlu berganjak daripada konsep toleransi ke konsep penerimaan, apabila kita menerima masyarakat majmuk di negara ini sebagai satu kekuatan dan menerima kaum lain sebagai rakan setia kita. (Syed Mahazir Syed Ibrahim ed. 2010:101) Kata perbilangan ada mengatakan;

Bulat air kerana pembentuk,
Bulat manusia kerana muafakat,
Faham sesuai benar seukur,
Bulat segolek pipih selayang,
Rundingan jangan selisih,
Muafakat jangan bercanggah,
Tuah pada sekata,
Berani pada seia.

Oleh itu ahli-ahli masyarakat mempunyai garis panduan untuk bermasyarakat dan tidak akan melakukan sesuatu tindakan di luar batas-batas kesopanan yang boleh mengganggu ketenteraman masyarakat yang lain. Maka dengan ini, akan lahirlah sebuah masyarakat yang aman damai, bersatu teguh dan disegani oleh masyarakat yang lain. Di sini wujud persamaan objektif yang hendak dicapai oleh adat dengan apa yang terkandung dengan syariat Islam iaitu membina masyarakat yang unggul dan mulia sesuai dengan fitrah manusia itu, "melakukan segala suruhan dan menjauhi segala larangan".

Pada syarak menyuruh berbuat baik,
Menegah daripada berbuat jahat,
Pada adat menimbulkan yang baik,
Menghilangkan yang buruk.

Oleh yang demikian jelaslah bahawa adat itu merangkumi segala bentuk kehidupan dan ia tidak dapat dipisahkan dalam kehidupan ini, termasuk segala bentuk kelakuan dan perbuatan manusia yang dianggap elok dan sesuai diakui sebagai peraturan yang tidak bertentangan dengan hukum Islam, dan boleh diamalkan oleh pelbagai kaum, ini jelas seperti perbilangan berikut;

Adat bersendi syarak,
Syarak bersendi hukum
Hukum bersendi Kitabullah,
Syarak tak menegah

Adat tak menghalang
Muafakat sekata
Barulah kerja dimula.

Ismail Abdul Hadi (2001:135)

Nilai Kenegaraan

Ibarat irama dan lagu Perbilangan adat dan Adat Perpatih merupakan elemen yang padu dalam suatu ikatan yang kukuh dan saling berkaitan. Hal ini kerana perbilangan adat dicipta dalam bentuk rangkaian kata yang mudah dan ringkas namun penuh dengan saranan yang bermakna. Tegasnya, apa sahaja bentuk dan persoalan tentang kehidupan termasuk soal-soal kenegaraan, penggunaan ungkapan kata-kata perbilangan adat ada mengungkapkannya. Ini kerana falsafah hidup manusia merupakan satu perkara penting yang perlu diberi perhatian, umpamanya ungkapan berikut;

Tahu mudarat jaga manfaat,
menenal laba juga rugi,
tahu di onak yang menyangkut,
tahu di ranting yang mencucuk,
ingat di dahan yang menghempap,
tahu di angin yang berseru,
tahu di arus ombak yang bersabung,
tahu di alamat kata sampai.

Khoo Kay Kim (2010) menyatakan ketidakfahaman ini telah membangkitkan pelbagai isu kadangkala menyentuh isu-isu perkauman. Umpamanya masyarakat perlu memahami kedudukan istimewa orang Melayu yang dipelihara sejak zaman British lagi, menerusi Majlis Raja-Raja Melayu. Kedaulatan itu dipelihara sehinggalah Perang Dunia Kedua. Pihak British cuba mengubah keadaan itu dan memaksa Raja-Raja Melayu menerima sistem politik yang tidak memberi keutamaan kepada orang Melayu. Keadaan itu menyebabkan orang Melayu menentang Malayan Union. Sehubungan itu Adat Perpatih ada mengungkapkannya nilai sejarah dan kehidupan ini seperti berikut;

Di situ iman diteguhkan,
di situ dada dilapangkan,
di situ akal dipanjangkan,
di situ hati dipukalkan,
di situ diri direnungkan.

Akibat sikap mengambil ringkas dan ambil mudah soal sejarah dan kenegaraan maka timbullah pelbagai kekeruhan dan salah faham. Sehubungan dengan itu ungkapan berikut harus direnungkan;

Penakik pisau seraut,
Ambil galah batang lintabung,
Seludang dijadikan nyiru,
Air setitik jadikan laut,
Tanah sekepal jadikan gunung,
Alam berkembang jadikan guru.

Khalid Bonget (2001:151)

Melalui penggunaan ungkapan dan kata-kata perbilangan adat ini diharapkan generasi masa kini mempunyai keterbukaan minda yang lebih mudah untuk memahami konsep kenegaraan walaupun kata-kata tersebut sarat dengan bahasa figuratif dan renungan pengarang terhadap alam.

Nilai Muafakat , Bekerjasama dan Tolong-Menolong

Nilai muafakat, bekerjasama dan tolong menolong dalam amalan Adat Perpatih merupakan ciri utama kerana nilai ini menjadi pegangan bagi ahli keluarga dan ahli masyarakat untuk melaksanakan apa juga aktiviti seperti majlis peminangan , nikah kahwin , kematian , dan lain-lain . Hal ini digambarkan melalui perbilangan;

Bulat air kerana pemetung,
Bulat manusia dek muafakat,
Rundingan jangan selisih,
Muafakat jangan bercanggah,
Tuah pada sekata,
Berani pada seiya,
Ibu hukum muafakat,
Ibu adat muafakat.

Pemuafakatan ini jelas juga digambarkan bagaimana seseorang ahli itu tidak boleh melakukan penindasan terhadap ahli yang serba kekurangan tetapi hendaklah sentiasa bermuafakat dan tolong- menolong , bak kata perbilangan;

Kalau besar jangan melanda,
Kalau cerdik jangan menipu,
Hati kuman sama dicecah,
Hati gajah sama dilapah .

Budaya dan nilai murni adalah asas yang mengikat masyarakat kita dalam satu suasana kehidupan yang harmonis dan sejahtera. Selain itu cara berkomunikasi dan berinteraksi yang baik melicinkan perjalanan proses kehidupan dalam masyarakat. Nilai murni didefinisikan sebagai perlakuan baik, perlakuan dan tatasusila individu manusia dalam hubungannya sesama manusia, alam dan Tuhan. Sehubungan itu senario dan kehidupan zaman dahulu banyak berbeza daripada zaman sekarang dimana ledakan teknologi moden secara tidak langsung telah mengubah budaya dan cara hidup bermasyarakat masa kini. Sifat-sifat luhur dan murni semakin terhakis, kesantunan budi bahasa yang dulunya menjadi kebanggaan masyarakat semakin luntur dan tidak lagi menjadi amalan masyarakat kita.

Nilai kepatuhan

Antara nilai kepatuhan yang jelas digambarkan dalam Adat Perpatih ialah kepatuhan yang perlu dilakukan oleh semenda dalam kehidupan keluarga baharunya, bak kata perbilangan;

Bila bersemenda di man-mana suku,
Sahlah kata adat,

Air orang jangan disauk,
Ranting orang jangan dipatahkan,
Adat orang dituruti,
Di mana bumi dipijak,
Di situ langit dijunjung,
Masuk kandang kambing mengembek,
Masuk kandang kerbau menguak,
Bagaimana adat di tempat semenda,
Dipakailah .

Selain itu , kepatuhan dan kesetiaan dalam Adat perpatih ini juga perlu dihayati oleh semua ahli keluarga dalam masyarakat. Jika ada yang menentang arus dan mencalarkan maruah, kesannya bukan sahaja kepada ahli keluarga tetapi juga kepada semua ahli dalam sukunya . Lantaran itulah kepatuhan dan kesetiaan ini dapat menghindarkan rasa malu bak kata perbilangan; “Malu tak dapat diagih, Suku tak dapat dianjak” . Perkara yang perlu diwujudkan dalam semangat perpaduan adalah perasaan hormat menghormati dan sikap saling mempercayai antara kaum. Rakyat perlu memahami dan mengamalkan bahawa segala tindakan perlulah mengutamakan kepentingan negara. Semua kaum perlulah menganggap bahawa mereka adalah bangsa Malaysia di mana segalanya perlu dinikmati secara bersama.

Nilai Kejiranan

Dalam kehidupan masyarakat yang berbilang kaum Adat Perpatih sesuai dilestarikan kerana ia merupakan adat yang keseluruhannya adalah berteraskan masyarakat. Oleh itu kebanyakan perbilangan adalah bertujuan mengajar atau memberi pedoman kepada ahli-ahli masyarakatnya tentang cara hidup atau aturan bermasyarakat seperti hidup berjiran. Sama ada tanggungjawab terhadap diri sendiri, keluarga, kelompok kekeluargaan dan masyarakat seterusnya. Contohnya sifat kerjasama dan tolak ansur dalam kehidupan kejiranan yang merupakan asas bagi pembentukan tali silaturrahim antara mereka perbilangan ini ada mengatakan;

Duduk berpelantaran,
dekat rumah dekat kampung,
soleh pinta meminta,
sakit pening jenguk-menjenguk,
sejamban seperulangan,
seperigi sepermandian.
sehalaman sepermainan

Ke bukit sama mendaki,
Ke lurah sama menurun,
Yang ada sama dimakan.
yang tiada sama dicari.

Perbilangan di atas jelas memperlihatkan hidup dalam masyarakat adalah saling bergantung dan tiada individu yang boleh hidup sendirian. Hubungan antara individu dalam masyarakat perlu rapat seperti sirih yang sesusun dan rimbun seperti serai agar tidak mudah

diporak-perandakan oleh mana-mana pihak yang ingin mengambil kesempatan ke atas mereka. Setiap anggota masyarakat perlu bersatu dalam semua perkara dan diharapkan tidak melakukan sebarang perbuatan yang memalukan ahli-ahli masyarakat yang lain kerana jika seorang daripada mereka melakukan perbuatan sumbang, maka seluruh masyarakat akan mendapat malu. Hubungan silaturrahim perlu sentiasa dijaga dan dipupuk:

Jika khabar baik diberitahu,
Jika khabar buruk serentak didatangi,
Jika jauh ingat-mengingati.
Jika dekat temu-menemui.

Ini bertujuan menggalakkan ahli-ahli masyarakatnya menziarahi sesama jiran tetangga, tidak kira sama ada semasa senang atau susah, jauh atau dekat. Hubungan yang erat perlu diwujudkan, dijaga dan dikekalkan.

Nilai Keadilan

Dalam melaksanakan undang-undang pula, keadilan merupakan tunggak utama. Undang-undang tidak akan tersekat oleh tali persaudaraan, kepentingan politik, tekanan rasuah, ataupun martabat kedudukan. Malahan, hubungan darah tidak boleh dijadikan alasan untuk membelakangkan undang-undang. Setiap keputusan atau hukuman harus adil tanpa mengira pertalian darah seperti yang diungkapkan:

Biar mati anak, jangan mati adat,
Mati anak duka serumah,
Mati adat duka senegeri,
tiba di batang, batang tumbang,
tiba di dahan, dahan patah,
tiba di urat, urat lembang

Menurut Tenas Effendy di dalam kertas kerjanya “Ungkapan Melayu : Mutiara Khazanah Tamadun Bangsa” (Pembentangan di Akademi Pengajian Melayu, Universiti Malaya : Julai 2008), ungkapan yang lengkap bagi ‘biar mati anak, jangan mati adat’ ialah;

Yang syarak wajib ditegakkan
Yang adat wajib dikokohkan
Yang lembaga wajib dijalankan
Supaya hukum boleh berjalan
Supaya adil boleh ditegakkan
Supaya hidup boleh dikekalkan
Pantang menghukum berpilih kasih
Pantang menghukum membuang bijak
Pantang menghukum membuang tuah
Pantang menghukum membuang adil
Hukum adil benar terletak
Yang salah dapat padahnya

Yang benar nampak tuahnya
Yang adat dapat ditegakkan
Yang lembaga dapat dikekalkan
Hukum tidak berbelah bagi
Hukum tidak dengki mendengki
Hukum sesuai hidup dan mati

Keadilan adalah nilai utama yang diberi tumpuan dalam melaksanakan undang-undang adat. Hukum adat amat melarang penghakiman tidak adil dan pemimpinnya bersikap berat sebelah:

Ibarat limau masam sebelah.
perahu karam sekerat,
tiba di mata dipicingkan,
tiba di perut dikempiskan.
menurut alur nan lurus,
menempuh jalan nan pasar,
memelihara harta pusaka,
kusut nan menyelesaikan,
keruh nan menjernihkan,
lupa nan mengingatkan,
panjang nan memendekkan,
senteng nan memanjangkan.

Setiap keputusan yang akan diambil bagi menangani sesuatu masalah yang dihadapi haruslah seperti:

Palu-palu ular dalam benih,
benih tidak rosak,
tanah tidak lembang,
pemalu tak patah.
ular mati juga;
umpama menghela rambut dalam tepung,
rambut tak putus,
tepung tak berserakan.

Begitu demokratiknya Adat Perpatih dimana setiap pemimpin yang dipilih bertanggungjawab untuk sentiasa memelihara kaum kerabat dan anak buahnya dengan adil dan bijaksana.

Nilai Kegigihan

Sistem masyarakat Adat Perpatih yang gigih berusaha mencari sumber pendapatan. Bukan saja ia didorong oleh nilai tinggi terhadap benda bahkan sebagai penjamin kepada hidup berkeluarga dan punca pendapatan dengan menambah milik tanah.

Kain pendinding miang,
emas pendinding malu.

hilang rupa dek penyakit,
hilang bangsa dek tak beremas.

Perbilangan di atas menggunakan kata *emas* yang dilambangkan sebagai barang yang amat bernilai dan dalam konteks ini boleh disamaertikan dengan harta. Ternyata perbilangan ini menggalakkan ahli-ahli masyarakatnya supaya mencari harta kerana harta menentukan maruah dan taraf kedudukan seseorang dalam masyarakat tersebut dan seterusnya membentuk bangsa yang dihormati sekiranya mempunyai harta. Konsep kegigihan ini boleh dihayati melalui perbilangan berikut;

Hendak seribu daya
Tak hendak seribu bicara
Biar berputih tulang
Jangan berputih mata
Bulat tak datang menggolek
Pipih tak datang melayang
Kalau tak dipecahkan ruyung
Di manakah dapat sagunya

Dengan demikian, anak-anak muda digalakkan merantau bagi mencari ilmu pengetahuan dan pengalaman yang akan berguna untuk masa depan. Seterusnya bagi menjamin kelangsungan hidup maka generasi muda ditanamkan sikap berusaha mencari harta untuk persediaan masa depan seperti yang ditegaskan dalam perbilangan berikut:

Hari panas kok tak bertudung,
hari hujan kok tak berpayung,
hari gelap kok tak bersuluh,
jalan lenggang kok tak berkawan,
berhemat sebelum habis,
sedia payung sebelum hujan.

Bagi yang merantau pula, dikehendaki kembali dengan membawa harta dan menambah harta yang ada, jika tanpa harta, pengalaman yang didapati semasa merantau digunakan untuk mengerjakan tanah pusaka bagi menggantikan golongan tua yang tidak berdaya. Oleh itu tanah pusaka tidak akan terbiar begitu sahaja. Mereka disuruh kembali seperti dalam perbilangan yang berbunyi:

Sekenyang-kenyang banting,
rumput dimamah jua,
sejauh-jauh melanting,
jatuh ke tanah jua.

Jelaslah bahawa perbilangan-perbilangan yang telah dibincangkan menggambarkan masyarakat Adat perpatih gigih berusaha untuk mencari nafkah dan menambah pendapatan. Ahli-ahli masyarakat digalakkan bagi meninggikan taraf hidup keluarga dan seterusnya membentuk bangsanya yang kukuh dari segi ekonomi. Konsep ini juga menjadi teras utama dalam masyarakat berbilang kaum di negara ini. Cabarannya ialah proses menerapkan budaya dan nilai ke dalam kehidupan masyarakat yang pelbagai sifatnya ini, bukanlah suatu yang mudah direalisasikan

disebabkan mereka memiliki pelbagai kelainan dan perbezaan sama ada dari segi cara hidup mahupun cara penghayatan amalan sistem nilai. Umpamanya kata perbilangan berikut ada mengunngkapkan:

Alang tukang terbuang kayu
Alang cerdik binasa adat
Alang alim rosak agama
Alang sefaham kacau negeri

Demikian juga halnya dari aspek pembinaan jati diri rakyat Malaysia yang sejati. Jati diri ialah rangkuman segala nilai, budaya, bahasa, pegangan, fahaman dan pandangan sejagat sesuatu kumpulan etnik atau kaum. Manifestasi dari rangkuman nilai-nilai tersebut akan membentuk watak dan sahsiah diri seseorang yang memancarkan watak dan sifat peribadi, cara berfikir dan *penampilan* diri yang melambangkan tradisi bangsa dan jati diri kaumnya. Cabarannya ialah pembentukan jati diri juga bukanlah sesuatu yang boleh dipaksa dalam diri seseorang. Ertinya adalah mustahil kita boleh memaksa sesuatu sistem nilai dan amalan budaya kepada seseorang yang lain (Shamsul Amri Baharuddin, 2007). Dalam mempertahankan konsep jati diri kata-kata perbilangan berikut mengunngkapkan:

Mengheret membentang
Menunjuk mengajari
Menegur menyapa

Seperkara lagi ialah cabaran yang paling getir membina jalinan hubungan harmoni antara interetnik dan intraetnik. Sebagaimana yang dimaklumi, Malaysia dihuni oleh pelbagai kaum dari pelbagai latar belakang budaya, tradisi, sistem kepercayaan dan anutan agama dan kepercayaan seperti Islam, Buddhisme, Daoisme, Hinduisme, Christianity, Sikhisme dan kepercayaan-kepercayaan lain serta amalan animisme seperti yang diamalkan sebahagian kaum peribumi di Sabah dan Sarawak (Zaid Ahmad, 2010:191).

Pohon rendang di tengah padang
Batangnya untuk bersandar
Dahannya untuk bergantung
Buahnya untuk dimakan
Daunnya untuk berlindung

Kesimpulan

Cabaran globalisasi masa kini memerlukan pembentukan generasi muda yang berdaya tahan melalui ilmu dan kemahiran. Berdasarkan beberapa aspek globalisasi yang telah dibicarakan dapatlah dikatakan bahawa dunia hari ini atau di abad ke-21 sedang menghadapi satu cabaran dan perubahan yang sangat hebat yang belum pernah berlaku di abad yang lalu. Cabaran globalisasi dan implikasi terhadap ekonomi, budaya dan teknologi adalah luas dan mempunyai kesan yang negatif dan positif. Penerimaan terhadap perubahan haruslah difikirkan dan diterima secara positif dan membina untuk kemajuan diri, keluarga, agama, bangsa dan negara. Sehubungan itu senario kehidupan masyarakat kini yang serba mencabar menjadikan sikap seperti enau dalam belukar

melepaskan pucuk masing-masing begitu ketara sekali. Tanggapan bahawa Adat Perpatih itu sebagai adat tradisional semata-mata sewajarnya dihapuskan. Nilai-nilai baik yang terjelma dalam Adat Perpatih itu tidak begitu dihiraukan dan seakan-akan dipinggirkan. Adat Perpatih boleh menjadi benteng yang kuat lagi kukuh, bukan sahaja dapat menepis kemasukan gejala negatif tetapi juga memberi identiti, jati diri serta berkemampuan untuk maju mengikut masa dan zaman. Perkara yang perlu diwujudkan dalam semangat perpaduan ialah perasaan hormat-menghormati dan sikap saling mempercayai antara kaum. Rakyat perlu memahami dan mengamalkan sikap dan tindakan yang mengutamakan kepentingan negara. Semua kaum perlu menganggap bahawa mereka ialah bangsa Malaysia dan segalanya perlu dinikmati secara bersama. Bak kata perpatih; sekata tak beralih, janji dibuat dimuliakan, buruk jangan dicari, musuh sama dihadang, berlunak sama berlumpur, bak kerbau sekandang, tanduk sama diasah, bak burung sesangkar, mengepal sekirai, bak ayam sereban, kecil besar sama sedayung, sakit satu semua berduka, bak labu nan menjalar, pucuk sama digetus, wakaf sama dipetik, ada sama mendapat, cicir sama dicari, untung laba sama dirasa. Di dalam hal ini masyarakat pelbagai kaum haruslah mengutamakan soal kesepakatan. Setiap pekerjaan dilakukan secara sekata dan jangan ada yang mencari musuh. Jika ada musuh mestilah sama-sama dihalang secara sepakat. Melalui penglestarian Adat Perpatih juga keharmonian sesebuah institusi keluarga, masyarakat, seterusnya pelbagai kaum dalam sebuah negara dapat diwujudkan bersandarkan kepentingan nilai kesepakatan. Bak kata perbilangan; "Gunung nan tinggi sama didaki, Lurah nan dalam sama dituruni, Hati gajah sama dilapah, Hati kuman sama dicecah".

Rujukan

- Halimah Mohd Said. (2019). Sistem Nilai Sejagat Demi Kesejahteraan Kita. Berita Malaysia. Astroawani.com.
- Ismail Abdul Hadi. (2001). "Amalan Singkap Daun Ambil Buah, Melonggarkan Ketentuan Menyebabkan Kepudaran Adat". Dalam Setitis Tinta Abadi. Pesta Persukuan Adat Perpatih. Seremban: Lembaga Muzium Negeri.
- Khalid Bonget (2001). "Peranan Suku Dalam Membina Masyarakat". Dalam Setitis Tinta Abadi. Pesta Persukuan Adat Perpatih. Seremban: Lembaga Muzium Negeri.
- Mohd. Rosli Saludin. (2010). Artikel "Falsafah Kehidupan Seni Komunikasi Teromba" tersiar dalam *Dewan Sastera*.
- Mohd. Rosli Saludin. (2009). Teromba Pengacaraan Majlis. Kuala Lumpur: Pustaka Salam Sdn.Bhd.
- Mohd. Rosli Saludin. (2007). *Naning Luak Terbilang*. Pulau Pinang: Goal Intelligent Publishing Sdn. Bhd.
- Nordin Selat. (2007). *Sistem Sosial Adat Perpatih*. Kuala Lumpur: Utusan Publications & Distributors Sdn. Bhd.

- Norazit Selat (ed). (1990). *Negeri Sembilan Dahulu dan Sekarang*, Muzium Negara Kuala Lumpur.
- Norhalim Hj. Ibrahim. (1995). *Negeri Yang Sembilan*. Selangor : Fajar Bakti Sdn.Bhd.
- Norhalim Hj. Ibrahim. (1993). *Adat Perpatih*. Kuala Lumpur: Fajar Bakti Sdn. Bhd.
- Norhalim Haji Ibrahim. (2007). *Sejarah Kewujudan Adat Perpatih, dalam Adat Perpatih Esei Pilihan* , Jabatan warisan Negara.
- Nur Fatiha Fadila. (2010). Artikel “Teromba: Wadah Manifestasi Falsafah Melayu” tersiar dalam *Dewan Sastera*.
- Ritzer, George (2009) *Globalization: A Basic Text*. UK: Blackwell Publishing.
- Tenas Effendy. (1989). *Ungkapan Tradisional Melayu Riau* , Kuala Lumpur: Dewan Bahasa Pustaka , 1989
- Shamsul Amri Baharuddin (ed.)(2007). *Modul Hubungan Etnik*, Universiti Teknologi MARA, Shah Alam.
- Zaid Ahmad (ed.) (2010). *Hubungan Etnik di Malaysia*, Oxford FAJAR Sdn. Bhd. Kuala Lumpur.